

兩浙輶軒錄補遺

兩浙輶軒錄補遺序

予督學時所輯兩浙輶軒錄既梓行矣其間應錄而未錄者頗有之惟以爲量吏之政不復能從事於此楊孝廉秉初等各以所輯補者將朶板行之就正于元元緝閱之誠能補前錄之所闕佚鉅卿名士本不以入錄爲重而錄詩者不可遺之至如一介之士或恃聲律以自表見與其刪之毋寧存之故元於此補錄者校之前錄刪泰爲少也

嘉慶八年夏浙江巡撫揚州阮元序

兩浙輶軒錄補遺凡例

一是編補遺採輯諸家一切規式悉照前錄之例
一諸家選本雖經前集採入然不免有遺卽如入

國朝別裁

四庫存目及名家選本之類概行補入

一諸家刻有專集未入前錄者酌選補入

一兩科鴻博未入前錄者蒐訪補入

一名臣循吏雖詩稿散佚準以人存詩之例蒐訪補入

一詩關本事可資文獻者蒐訪補入

一閨秀方外仍照前例酌選補入

一輯補者爲楊書巢

秉初

俞蓮石

寶華

潘初晴

學敏

陳晴

巖

傳經

汪東村

嘉穀

華復堂

日南

余心白

習

採有成帙

彙寄入選者爲袁陶軒鈞徐雪廬熊飛朱椒堂爲弼陳

曼生鴻壽張秋水鑑鄭簡香勳楊芸墅文藻施少峰嵩

蔣蔣村燭

兩浙輟軒錄補遺總目

卷一 九十四人 詩二百十二首

卷二 一百三十一人 詩二百六十一首

卷三 八十六人 詩一百四十六首

卷四 八十六人 詩一百五十三首

卷五 一百三十四人 詩二百二十五首

卷六 一百六十八人 詩二百六十四首

卷七 一百六十三人 詩二百七十八首

卷八 一百五人 詩一百九十五首

卷九 方外六十五人 詩九十二首

卷十 閩秀八十八人 詩一百五十五首

共一千一百二十人

共詩一千九百八十一首

兩浙輶軒錄補遺卷一目錄

馮美玉 鍾 彝 周文暕 丁 璟 胡季瀛

翁祖望 胡 亶 錢 江 張天植 褚唐俊

方躍龍 汪繼昌 陸 彪 孫光熹 蔣 臻

項景襄 傅感丁 查 雍 俞之炎 陳 忱

陳散永 錢 黯 戴錫綸 徐旭齡 顧豹文

顧龍文 邵 嘉 張惟赤 沈振嗣 俞 麟

鍾 朗 胡 燧 盛民譽 俞周煒 施顯謨

仲宏道 李 確 胡夏客 徐之瑞 查 遺

曹元方 錢繼章 沈祖孝 顏俊彥 陳祚明

陳晉明 徐允瑯 錢汝霖 胡 山 王蔚章

陳廷會 高斗魁 沈 機 王 湮 卓人月

徐肇森 孫 爽 張 賁 姜燮鼎 錢 豹

聞性道 懷應聘 張履祥 俞長民 張 默

孫纘祖 朱之嶼 翁 逸 張炯曙 吳夢鼎

吳名溢 馬 湘 張兢光 葛宗信 來 蕃

徐士俊 顏鼎受 高佑鉅 陳巽之 李明菴

方城鄒 潘錫晉 邵 琳 褚 醇 陳大瑜

盛 逸 錢爾復 張振孫 章世法 沈 煌

傅 日 黃 鼇 汪用嘉 陳令盛

兩浙輶軒錄補遺卷一

馮美玉

字樂天一字玉蕤長興人順治丁亥進士官蒲縣知縣

湖州府志美玉令蒲時征勦土寇敘功當擢以金創告歸林居四十餘年

楊秉初曰玉蕤治蒲政績懋著歸田後吟咏自適其宮詞一首云春色三分去君恩何處畱鳥啼皆是恨非獨

落花愁迄今著

中人猶傳誦之
俞寶華曰玉蕤為順治丙戌解元入

國朝來科自玉蕤乃吾浙第一人而前錄遺之亟搜錄一
集弁冕云

懷郭紫萃學博

山色橫西窗先生展書史扶桑升晨暉青芬來窗裏紅葉階
前翻輕風蘋帶起一讀一賞心書聲落茗水今日溯洞中不
見伊人矣望遠發浩歌依然暮山紫

鍾彝

原名元圭字紫錫一字彤菴桐鄉人順治丙戌舉人官陝西鳳翔府推官

憩福壽禪林

西村晝靜溪光綠信步閒吟溪水曲古寺荒涼不見僧寒蟬
獨自啼修竹修竹寒蟬日欲斜林梢濯濯散紅霞漁舟煙火
喧歸棹羨煞雲山卽是家

周文燧

字禾仲一字元龍海寧人順治丁亥進士官湖廣黔陽知縣

海寧州志文燧蒞任甫三月值靖州降鎮陳友龍復叛文燧出督餉遇賊被執不屈死妻施自縊死妾王投井死闔門殉節者八十餘人祀湖廣名宦

從軍行

北風獵獵胡笳咽白石黃雲無顏色腰間一雙金僕姑誓欲
殺盡陰山賊男兒弧矢志四方有淚不灑妻子旁六韜三略
無成法指顧風雷掃機槍那忍俛首事文吏目中習見之無
字又或齷齪競錢刀蛙鳴蠓門等兒戲揚鞭笑指天邊雲怒

馬踏盡隴頭塵親操枹鼓擐甲冑要與朔漠回陽春君不見
燕領虎額飛食肉玉門生入功何卓又不見銅柱巍巍光史
冊摩崖尚畱一片石生亦不願封酒泉死亦不望圖凌煙日
落醉臥沙場邊匈奴不敢張其拳丈夫快意此爲極紀功底
用如椽筆

丁

璟字賢愷一字宋若長興人順治戊子拔
貢官直隸大名府通判著枕經齋吟藁

韓菱行略公淹博好古官大名
有廉吏聲詩宗杜韓出入蘇陸

秋風調和蔡崑陽修撰韻

大火西逝天旗羅祝融南駐飛廉過忽然萬里一長嘯潛軍
突出鳴刀戈駛雨得勢成塊北狂雲無主垂鬚髭誰言九秋
莫宇豁古鏡千年昏不磨夜來老屋聲轉壯堅臥直恐翻江
河金神按節曾幾日奔駒閃隙騰龍梭商音激楚不堪聽志

士傷喟多悲調嗟爾落魄亦已久壯心猶作煩惱魔丈夫會
當據要路何乃貧賤長軼軻巧者有餘拙不足紛紛得喪原
無宅尋思轉輾傷風抱悲吟且復同羊何夜闌燈炮何所見
塵沙相撲林相摩

胡季瀛

字子甫一字念齋海鹽人順治戊子副貢生官江西九江知府著灌木菴詩集

汪嘉穀曰公爲孝轅先生第三子出明經仕農曹出爲九江太守多循蹟

方池

誰鑿方池淡宦情春風坐嘯草旋生一泓倒影涵天碧小院
停流過雨清日臥姑溪閒郡事水從官舍念農耕此中莫道
才涓滴也自分流四澤平

翁祖望

字渭公錢塘人順治己丑進士官吏部員外郎

浙江通志祖望授中書歸里旋起拜御史巡視宣大有紳素橫不法祖望疏劾之朝野震悚然以此失左右歡

後調考功員外乞歸

華日南曰渭公通志作員外郎而柴臨川浙人詩存作吏部侍郎誤矣

新灘

蜀道于何險艱難最此磯濤聲衝地轉峽勢束天低破碎舟航疾摧殘性命微浮生應有盡何事履危機

胡

宣

字保叔一字勵齋仁和人順治己丑進士官通政使

杭州府志宣以編修出為常鎮道海寇犯境宣親佩弓韃力保危城入為鴻臚卿進通政以乞養歸不復起持身嚴正居鄉不以寸牘干官府邑有利弊則竭力爭之孝父母以孝聞王暉今世說勵齋性謙下終身無疾言遽色父患脾疾日夜視湯藥衣不解帶中裙廁踰皆自滌之及卒三日勺水不入口一慟吐血數升以毀成疾遂卒

寧海道中

蒼山插霄漢縱目豁心胸嵐氣連千嶂濤聲入萬松沙明帆

影斷雨霽翠陰濃歧路無須歎琴書樂我從

錢

江

字珥信秀水人順治己丑進士官陝西岷洮道

嘉興府志珥信知瑞金縣歷官

山東提學道改陝西岷洮道

華日南曰珥信令瑞金時劇盜聚僧兵千人據銅鉢山以叛珥信以計擒縛其魁又部勒鄉勇俘斬無算盜悉平歸田後得宋焦虎臣遺址重建亭樹嘯傲其中詩名雋可誦

綠溪漫詠

歸來少有林泉趣近築茆堂在舍南樓外修梧初映碧橋邊
流水晚拖藍愛延逋客開三徑許其名僧對一龕聽法談詩
吾事了十年悔不早抽簪

涌山樓畔煤如雪竹影團團覆地陰一日坐來如雨日短晡
行罷復長晷風波不作花閒舫山水疑調松下琴把卷開尊
兩不厭放翁詩句醉翁心

張天植

字次先秀水人順治己丑進士第三

楊秉初曰次先同榜狀頭為劉子壯榜眼為熊伯龍次
先文章聲價頗同兩大學士為河南頗釐積弊所著有南
北遊草等集已佚僅存近體
數首吉光片羽彌足珍云

歲暮途中卽事

有雲依北近無雁寄南還野濶孤烟直村虛獨樹閒才名消
歲月窮達半關山從古英雄迹浮沉行路間

望醫無閭山

驅馬遙看古嶽前疎林黯黯下寒烟日啣雙塔傾西向雲擁
羣峰拱北懸地發玉膏開漢土天垂赤簡紀堯年名山閱盡
興亡事鐵馬金戈落照邊

褚唐俊

字南來錢塘人恩貢

徐潮傳畧舅氏南來先生唐右僕射昭忠公裔孫聰穎
過人博學能詩順治二年由明經從事軍營授將樂令

將樂當兵燹後俗敝民凋公撫綏備至民誦德焉三年
寇犯福寧奉調防禦與賊戰身被重傷死而復蘇者再
四年寧化賊羅廷等寇將樂公率壯士鏖戰殺賊甚衆
次日賊雲集逆氛益熾公與弟庠生唐秀并家丁等死
戰被害妻朱次子福生皆殉難春秋二十有九幸
長子驪未隨任得免難一豚相延至今未艾云
楊秉初曰南來先生殉節將樂行事炳若日星而詩不
多見其五世孫宗瀨與余同徵備述祖德手出遺詩見
示覺忠耿之
氣溢楮墨間

泊舟漢口

臨流問水漫徘徊漢上晴峯點筆開戲日鼉鼉浮浪出弄晴
鷗鷺候潮迴千檣雲列東西立一線鴻分南北來兩岸平沙
催夕照飛霞片片落吟杯

登晴川閣

晴川閣下浪飛寒江上風帆欲駐難暮鳥帶雲還浦際淡煙
和月起林端交通賦就花生筆摩詰圖成樹染丹忽聽簫聲

驚客耳玉人何處倚欄干

飲孟太素署

爲學淵明早拂衣北堂曾灑淚霏微幾年薄祿親闕缺數載
浮名友道稀多難似余仍作客有官如爾尚愁歸相逢幸喜
深深醉漫向任公問釣磯

次林令威過夢澤原韻

短衣斑髮客中心行李蕭然萬里深況有文名高宇內豈慙
遊跡遍山林漢東秋色君同調楚北寒雲我獨任江上故園
頻入夢問誰歸去寄鄉音

送春

柳葉翻風繚亂飛畱春不住送春歸黃鶯猶憶前宵樹紫燕
空懷故國衣無限韶華消夜雨滿庭淑景謝朝暉眼看節序

如流水紅顆櫻桃喜正肥

方躍龍

字去震於潛人順治己丑進士官臨洮同知

於潛縣志躍龍初授華容令土瘠而衝賦重役繁竭心撫集治稱楚最

晚眺

慢卷晴窗坐更幽夕陽低映水西頭數聲鳥破林烟冷百尺松圍塔影秋何處疎鐘沉野寺無邊山色湧危樓曠懷擬欲登天目狂賦凌雲記勝遊

汪繼昌

字徵五一字晦岸錢塘人順治己丑進士官湖廣下江防兵備道著有海岸詩集

憶內弟吳國佩

典型誰可託良朋重擬前游淚欲冰報國文章推鄴下承家孝友繼延陵鶯花二月黃墟酒風雨深更古寺燈爲惜暫離翻永隔皇天有眼竟何憑

陸

彪

字繡公烏程人順治己丑進士官廣東雷州知府

湖州府志彪初授韶州以清勤薦艱歸改補雷州振興學校勸課農桑擒降大盜又雷郡久羅兵燹力請於撫

軍得鐫入徵二至今口碑載德

俞寶華曰繡公詩見蘋洲流芳錄

送郭紫萃教授歸里

南浦霜清橘柚餘遙山斜月入舟虛盤供苜蓿沾君祿廬倚

松楸讀父書蝶影夢通華表鶴燕巢懸共講堂魚只今弟子

畱紳帶好寫佳言佐石渠

孫光燾

字丹扶餘姚人順治辛卯副貢生官蕪城知縣

張廷枚曰先生淡于仕進丁內艱歸不復起以吟詠為事尤長於擬古合處雖江淹雜體未能過之

遣興

鳥也花名之布穀催春種花也鳥名之鶯粟全無用濟時不

在大秋實誠爲重盧駱美才華猶不如屈宋

堯禹無鳳凰無鳳亦自盛伊周無麒麟無麟亦自聖人所可爲事胡爲付天命乃知圖與書非關陳瑞慶

蔣

璩一名玉章字彖鴻又字禹書嘉善人順治辛卯副貢生著靈威集三逕草

嘉興府志璩有雋才與兄玉立會貞有武塘三蔣之目

大風過震澤

具區波浪高如山穹窿縹緲雄其間東望空濛雜煙雨蒼茫不辨勾吳關山中榜人不得渡但見漁父逐浪相往還鼉鼉出沒魚龍舞使我對此彫朱顏日暮天昏風轉急黑雲蔽天浪頭白蜃樓蛟室半浮沉萬里銀濤瀉空碧洞庭灣內水雲幽客子移舟逐細流夜半篷窗風雨吼魂驚魄悸無時休明日風微浪初歇錦帆蘭槳山邊發還將絲纜繫河干去住彼

此何超忽回首湖山路渺漫靈威石室夢中看丹苞朱實乍
隱見層巒積翠遙嶺岼子胥吹簫一何苦少伯乘舟強自寬
安得上登七十有二之高峰下窮三萬六千之狂瀾置身洞
天與福地矯首人間行路難

蜀國絃

琴心通上客綠綺試臨叩曲自當筵度人還隔坐逢錦江三
疊水玉壘九迴峰送入絃中怨能消鏡裏容

項景襄

字眉山秀水籍錢塘人順治壬辰進士官兵部右侍郎

杭州府志景襄遇事敢言時議減死者全家戍烏喇山左漁船禁用篷桅皆力持不可乃止淹通羣籍工書法

南屏

蕩艇入南山晴湖淨如拭繫纜枯樹根寒煙生微白偃臥周
山阿腳步層巖隙方丈出松巔亭亭高百尺入門逢老僧塵

纓頓若失說法水月心妙香浮廣澤落花滿空林披雲坐磐石置身在霄漢庶以慰營魄安得常如此元言共朝夕月出竟忘歸零露沾衣溼

題畫

閒來結得小茅亭但識煙雲月露形
厓日不書藤葉紙年年只記柳條青

傅感丁

字雨臣一字約齋錢塘人順治壬辰進士官副都御史有舒嘯軒集

錢塘縣志感丁初授德安推官擢御史巡河東鹽政歸喪惟琴書而已歷遷通政上念其爲言官時有直聲

授副都

御史

余習曰雨臣爲詩不拘繩墨而時多逸思

登海湧峯

昔聞虎臥此高邱今日登臨最上頭
近接靈巖惟片石遙觀

雪浪有孤舟消沉伯業同煙草寂寞禪心視水漚劍窟泉飛石梁北聲隨香梵幾時休

查

雍

字漢園一字以齋海寧人順治癸巳拔貢生

淮北道中

故人今日異淮左昔年遊萬戶臨沙岸層城帶濁流煙空天更遠樹老葉先秋海內離家客應同此地愁

雲隱山樓晨鐘

古樹覆高樓開簾宿雨收一聲清磬發萬戶曉煙浮歲月消蓬鬢行藏笑蒨緌西郊春色好吾欲放輕舟

俞之爰

字以除桐鄉人順治戊戌進士官御史

汪嘉穀

曰以除子長城長策皆名進士一門才藻不減眉山蘇氏

落花

料峭東風至堦前見落花一林紅雨亂幾樹綠陰遮小徑人
踪斷閒園夕照斜詩成還獨立徒自惜芳華

陳

忱字用直秀水人順治甲午

副貢生著有誠齋詩集

嘉興府志用直少孤力學為詩文質

于曹侍郎溶朱檢討彝尊得有指歸

楊文藻曰用直與猶子堯天竝以詩名尤為曹秋嶽司

農所賞生平著述詩集外有不出戶庭錄讀史隨筆同

姓名錄
諸書

范大夫祠

霸業銷烏喙花宮祀大夫書還名越絕里自屬陶朱苔石思
羅綺春城聽鷓鴣明粧無處所螺髻現晴湖

茗城雪中歸櫂

孤城門未啟風雪一舟停村店茅柴酒官塘牧馬亭逼寒頭
轉白仄岸草猶青歲晏歸心迫鄉音易動聽

陳敦永

字繼期一字學山海寧人順治乙未進士官工部尚書謚文和

依韻酬念祖弟歸應省試

河橋折柳悵難畱且試驅車歷九州芳草平沙逢驛騎斜陽
深樹見山樓洛中已識三都賦江上休披六月裘桂子秋風
應早發好攜彩筆渡金溝

錢

黯字長孺一字書樵嘉善人順治乙未進

歸里後杜門著述卒年九十有五生平事親盡孝暇則
肆力經史百家書法追二王兼擅潑墨自設
科來登第踰七十年者吾浙中指不多屈也

過涇縣水西寺

馬蹄得得趁平沙高下林巒入望賒淺瀨過帆迴雉堞淡煙
籠竹隱人家亭涵疎雨松濤細寺俯驚雷夕照斜客路風光
在何許紙窗月影到霜花

戴錫綸

字繇如一字緘三餘姚人

張廷枚曰先生庚戌分校禮闈識拔皆偉器太倉王公揆甬東黃公斐其尤著者

舟泊夜塘

西南纔度又黃岡一葉飄飄駐野塘
游子心隨流水急榜人背指黑雲忙
孤村宿雁驚漁火遠樹棲鴉噪夕陽
試問山陰何處是煙波萬里正茫茫

徐旭齡

字元文一字敬菴錢塘人順治乙未進士官工部侍郎總督漕運諡清獻

浙江通志旭齡先世居玉山父一鴻徙家錢塘仍授徒故里順治戊子山寇竊發一鴻遇害旭齡往來求父屍夜夢父攜示屍所且曰當問之毛廿八旭齡行至魯家倉風雹大作有童子引入茅舍一父老出旭齡曰丈人非毛廿八乎父老驚駭告以故乃指空林間土微掩處恍然如夢所見急嚙指血沁之解所衣裏骨歸渡河有感

煙雨蒼涼九曲河十年宦迹屢經過
壯懷長托中流楫離思

愁聽欸乃歌北望燕山黃鵠少南憑楚水白雲多丈夫不惜
征塵苦破浪應乘萬里槎

送吳次公游蓬萊兼呈沈留侯

爲厭風塵作客難且依仙吏策輕鞍燕臺碧樹雲初轉秦望
神芝露未乾豈有侯門憐俊骨好從海客問金丹酒徒去住
應無定離思中宵月裏看

顧豹文

字季蔚一字且菴錢塘人順治乙未進士官御史有世美堂集

今世說御史彈劾不避權貴然卒無妄言嘗曰言而當
足以裨國是言之不當雖諫官非計一時天子不以爲罪使異日輕
朝野以爲得人楊文藻曰且菴先生以真陽令擢御史遭內外艱歸里
遂引疾不出得城北葛氏廢園建小樓其中名曰願圃
與二三老友商略經史卒年七十有五有願圃日記

林逋墓

孤山孤絕孰爲朋
掃徑烹茶仗老僧
雪瘦只畱梅幾樹
秋高不見鶴雙騰
夢過栗里依彭澤
水隔桐江伴子陵
千古清風兩湖月
我來對坐暮煙凝

登六和塔同顥亭淇上

高塔鎮江浦
浮屠開化城
俯挹江漢流
仰視日月生
東隅啟戶牖
北斗低簷楹
頗愧羽翮微
顧覺形體輕
昔聞武肅王
此地久削平
澤國苦風雨
江介愁滄溟
強弩射潮頭
氣已無蓬瀛
天吳與海若
指揮歸前旌
猶恐數百年
崩濤東南傾
大師荅願力
七級增光明
風鐸喜突兀
星燈何崢嶸
鬼神守法界
造化知中誠
百國奉正朔
從此當銷兵
熙朝深德澤
一戰巨海清
咏歌尊百度
舂蟠蠶懷三靈
陳迹一以思
再拜方屏營
傾杯相歌舞
春衣墮明星
陳詩紀錢塘
法歌破青冥

河渚贈咸上人

上人高臥隱巖扉聞爾聲名見面稀
安坐寧知雙樹老行齋正值百花飛
石牀暑氣消芒履乳竈仙飈卷葛衣
我有愁懷平未得不因傳法欲皈依

顧龍文

字仲御錢塘人貢生

楊秉初曰仲御與弟豹文齊名人稱顧氏二難余習曰仲御與吳徵君慶百友善刻燭聯吟傳誦一時

雲山夜雨

空山晨夕雨客旅倍凄然
夜久爐應燼更寒漏不傳
夢移僧寺火響落碧溪煙
雲氣千巖濕江聲萬樹懸
迴風驚宿鳥複嶺下飛泉
嵐動腥迷屋林深冥接天
撫觴嗟獨旦破夢發陳編
白髮經年歲消磨是此邊

邵嘉 字令如富陽人順治乙未進士官鴻臚少卿著詹詹集

俞寶華曰令如督江南學政時每縣入學額止四名故每得佳卷不忍棄置即捐俸代為援例所歷學宮頽廢輒為修葺都御史魏象樞疏薦晉鴻臚寺卿以終養歸

雲泉寺

一路經遊處能清塵外心禪房藏曲徑仙梵響疏林岫遠煙雲合庭空草木深此中多別趣臨去復沈吟

獨坐桐嶺下

獨坐層巖下悠然清景來白雲留日色餘影落青苔

張惟赤 字侗孩一字螺浮海鹽人順治乙未進士官工科掌印給事中有退思軒詩集

俞寶華曰螺浮官御史時世祖方銳意向諫臣公知無不言每上封事輒報可而請停圈占革厥夫諸疏尤關政本丙辰冬卒京邸沈太史珩撰墓表其詩稿則王岱喬映伍序之

出都賦別諸同人

猶有荆高舊酒壚相逢若箇問菰蘆道場索米居難易臺畔
銷金事有無懷刺禰衡空自累上書韓愈總成迂蕭蕭碣石
經旬暗爲聽驚鴻又戒途

雨中麥糊店

濁河初斷泊孤篷繞岸蘆洲一望中鷄犬不殊鄉語絕麥糊
供饌酒旗空荒籬點點殘宵柝微雨深深暗草蟲最是客途
秋易老黃雲何處覓飛鴻

東郡七夕立秋

光岳樓前暑氣收斷雲疎雨送扁舟關河暝色催砧近海岱
煙嵐入樹浮天上雙星方渡漢人間兩鬢又驚秋明朝玉笛
聲淒切風起黃榆白雁愁

沈振嗣

字玉集餘姚人順治戊戌
進士官翰林院庶吉士

張廷枚曰太史弱冠卽掇巍科卒年二十詩無存者茲從其後人錄得一首

松林道中

蕭瑟松林道西風送客遊鷄聲村落午雁陣海天秋涼葉紛
茅舍晴煙上水樓吟鞭斜指處遙望不勝愁

俞

嶙字仲臯一字嵩菴餘姚人順治戊戌進士官從化知縣有沐雅堂近體粵遊草

俞寶華曰家嵩菴器宇英俊喜讀有用之書官嶺南時下車卽刻陽明文集以經術飾吏治不沾沾以詞章自命也

感遇

所遇已如此萍踪何足論閒惟消白墮愁不怨黃昏緩急誰
爲語寒暄我自存相將移棹去往事欲銷魂

憶幼兒公昂

欲別牽衣袂依依不忍言未能知喪亂且與說寒暄字句從

師授饑寒向母存出門方一月憶爾在晨昏

剡溪阻雨

孤棹剡溪路淒其寒雨中潮吞兩岸白村隱一燈紅作客煩
鄉夢占風聽落桐濤聲清到枕踪跡信飄蓬

鍾

朗字玉行石門人順治己亥進士官陝西提學道

汪嘉穀曰王行中順治甲午解元其尊人景音先生偶於歲暮自外歸途次風雪大作止一古廟見聚丐劇飲佐以鮮果竊異之欲往叩問一丐叱之曰無多言急歸爾家當生貴子矣至則解元已墮地

題黃大癡古木歸鴉圖

古木蕭疎夕照邊暮鴉幾點帶寒煙披圖觸我歸思切回首
家山已十年

胡

燧

字匡叔一字匡巖餘桃人順治庚子副貢生有青雪樓集

嚴沆曰匡叔早受知於陳大樽詩文得其指授晚而剡落脂粉格老氣清於師門爲轉手

秋暮

洞庭今始波木葉蕭蕭下
虛館知涼生竹雲淡如瀉
天氣日夕高飛鳥自閒暇
人我徒欺凌身世兩相借
聊爾憑化遷安事彈與射

盛民譽

字來初一字仲來秀水人順治辛丑進士官廣西桂陽知縣

俞寶華曰仲來為袖堂明府曾祖以司李改官桂陽有惠政葺濂溪祠延桐鄉顏鼎受講學署齋未幾引疾歸詩藁散失僅盧陽草一卷皆宦遊所作

初至桂陽

十室成孤邑千山作宦遊
秋塵連葑屋瘴霧隱城樓
湯火憐新去人煙聚未稠
但令民俗好寧惜此淹留

登君子嶺

盤輿欲上最高山
君子清標未可攀
雲樹平分三楚色
風煙

半入五溪蠻天低鷹隼摩空去日落牛羊放牧還夷險可知
隨境有勞生得此片時閒

俞周煒

字恭藻秀水人順治辛丑舉人

楊園見聞錄恭藻善文辭有美志而少無師友

皎皎明月篇

皎皎明月姿塗塗露更繁朝華夕以敷松柏何巘岼萬物固
相遠誰能強所歡愧我嬰世網中路復悲歎日出多徬徨日
暮心苦酸何如拾瑤草白雲共盤桓

施顯謨

字伯文一字松菴孝豐人著知夢庵詩鈔

汪嘉穀曰松菴前明內閣中書入國朝不仕嘗搆精舍署曰知夢菴築生壙于菴側臨歿時盡焚其所作與愚山先生一詩其後人得之菴中破書內題壁二首墨痕尚在在一署丙戌一署辛卯皆入國朝後作也嚴進士彭年為撰傳稱其詩宗擊壤讀三詩殊不盡然

何折齒汗錄補遺

卷一

俞周煒

施顯謨仲宏道

与

與家尚白閨章

吾宗宛陵彥邀我敬亭山故國春風煢夕陽遊子顏有花遲
共醉無句待君刪揮手憐垂暮明朝度石關

知夢菴題壁

空山雨急萬松楸夢醒圓菴最上頭投足小園聊當宅傷心
故國獨登樓杜陵已分偷生老白傅多從覺路求自有青厓
馴白鹿風波江外不關秋

又

閑嬉歲月和松老玩適溪山伴月華十載歸來猶穩卧諸公
強半已無家

仲宏道

字開一桐鄉人貢生官
嶧縣知縣著改菴詩鈔

俞寶華曰明府官嶧時設徠安社招復流移作哀嶧吟
十二章人比之元結春陵行其全集乾隆間采入四庫

見浙江遺書總目中所著

尚有理嶧拙言桐鄉縣志

洗藥井

山色傍霞紅峰頭水氣融恠來能療疾遺藥在泉中

爰山隱居和貝清江

陶陶耕釣自成村風雨山莊晝欲昏鳥送春歸還到牖雲移
月至自當門高吟短句隨流水倦卧繩樞學放豚正是幽居
無限興又看修竹長龍孫

李

確字潛夫平湖人

魏禧與周青士書潛夫今年八十一矣家奇貧無子僕
往見已耳聾於粉版作教使客以墨筆書所言相酬答
僕自道出處潛夫輒視而泣又出所著作令僕觀覽僕
檢奉銀五錢暫具十日供潛夫五反僕曰非踰樹也乃
受之

嘉興府志晉夫本名天植明崇禎癸酉舉人後改今名
遜居龍尾湫山往往絕糧間績棕鞋俟天日僧至償其
直易去長吏守帥聞其名訪之輒踰垣避年八
十二預知死日賦詩偃卧乃卒私諡介節先生
俞寶華曰潛夫爲前明遺老但入
國朝幾三十年且所刊九山遊草及梅花百詠
欽定四庫全書已載入
本朝別集存目中今謹遵仿采入

集壽海堂

古殿城南路不遙天空雲淨夜寥寥孤懸海嶠三秋月寒落
沙汀萬里潮葉露垂垂鮫客淚階蟲嫋嫋羽人簫遊情詩思
俱塵外不負清尊是此宵

春日同社友訪林翁

林翁隱居一茅屋繞屋青山皆骨月故人在昔識翁顏攜我
乘春看修竹竹籬蓬戶春陰陰苔徑松關鎖猿鹿隣翁爲我
前致詞此翁溪山往來熟有時閒投溪上竿有時閒出隴頭

牧鳥啼日暮翁未歸相對羣峰秀如鋏

苦竹山眺遠

路入斷山隈蒼茫海市開竹林秋雨歇石瀨午潮迴碣古餘
秦字蜃銷出月臺忘機是鷗鳥於我更無猜

胡夏客

字宣子一字鮮知海鹽人著谷水集

陳光緯曰先生從職方公守定州羽檄旁午屢授簡牘
咄嗟立辨迨職方懸車後纂唐音統籤摭撫羣籍先生
與有力焉年七十四臨終命

侍者取手巾拂鬢含笑而逝

俞寶華曰宣子明職方郎中震亨子少年以諸生貢成
均開革後隱居不仕所著集二十二卷入

欽定

四庫全書別集存目中

李商隱離情

餘香故染抱時衣淚制花菲迄雪霏何日芭蕉心盡展通宵
蝴蝶夢空飛華茵煖去憎多幅窮袴寒加知幾圍莫道離情

成遠隔驗來相合有歡歎

溫庭筠閨思

怨竹織簾垂淚紋甲香添炷爲誰焚慵粧任婢開奩待善病
嗔人帶酒醺兔藥不靈遮一半鶯花漸老剩三分春愁可是
無春夢底事高唐祗賦雲

送荆南使者張公

地形阨要最荊州兵事才遶第一流持節重開元凱鎮攜毫
好賦曲江樓西山爽氣來旁邑南紀朝宗擁上游祗笑故人
無幕畫躬耕何自可依劉

月夜舟

月就儂船墮清光滿一艙今宵歡抱月水宿學鴛鴦

徐之瑞

字蘭生
錢塘人

黃宗羲曰蘭生先生與汪魏美萬履安巢端明浙中謂
之四先生抱道不仕每當有司推選先生不行以危法
和中之先生舉所佩輒以示之曰此我磬懸之具也先生
之詩長于樂府嘗為西湖竹枝詞以寓變哀之感流傳
倡和仿
佛徽崖
蔣炯曰先生當申西後棄孝廉廼居北島山妻女皆能
詩自相唱和身後藥盡散失今從
皇清詩選中
錄入

懷隱

清溪珥其流高山環其宅田廬亘蒼莽采藥恆日夕思憑滄
海身仰企雲峰客桐几經千年風雨晦靈跡杵木變樵柯丹
書互毀蝕縹緲煙中區桃花覆蒼碧自非靈臺仙何為食松
柏

查

遺

字逸遠一字學圃海鹽人有學圃堂集

俞寶華曰

逸遠原名崧繼字桂青入

國朝

後改今名以子初白查浦兩太史貴贈如其官

兩浙詩千集甫貴

卷一查遺曹元方錢繼登

庚戌除夕

殘年傷老大萬事感因循去日知何日淒其戀此辰
明燈還顧影細草自迎春尚有忘年者嶽崎歷落人

甲寅元旦

不道菁華減春風入敝廬心驚殘臘後身歷歲寒餘
年往仍憂世時艱卻著書平生莽莽意獨悵此居諸

曹元方

字介皇一字耘菴海寧人著有淳村詩集

樓頭

樓頭又見月嬋娟觴酌歡呼憶去年自覺顏衰羞對鏡
每逢書好恨無錢飛雲驟雨塞翁馬淺水蘆花漁父船
若把世緣冷眼看滿園蝶翅總踟躕

錢繼章

字爾斐一字菊農嘉善人

俞寶華曰菊農孝友力學鉤纂甚富晚築谿然園綴石
蒔花垂老不倦著有聖堂自刪集兄繼登亦有名因仕
前明爲給諫
故不復列入

園居記事

山翁問山僮猶有餘粒否僮言餅粟空無飯尚有酒翁荅酒
亦佳傾之得一缶舉觴成獨醉自午睡至西北隣饋脫粟侑
以東畦韭暫飽意氣舒萬物皆芻狗

過雨擁輕雷雨止晴未續園丁荷鋤來我欲種甘菊沿地插
芙蓉隔牆補修竹莪葵尚未花移近窗前煥草木亦生命斧
斤恕樸檟石氣傳素琴蕉涼入茗粥偶愛溪上魚因置谿邊
屋屋成意已懶無魚良亦足

酬趙萼客

莫話從前事相看只剩魂詩能窮買島絲欲繡平原逕破苔

痕積窗淹竹氣昏高軒應少駐隨意緩傾尊

沈祖孝

字因生一字霽漁歸安人

湖州府志祖孝原名果少以詩酒豪其鄉甲申後奉母之松陵結鷺隱社士之隱而有文者胥集焉晚年賣卜為成自署楹帖曰于只依孝弟下簾仍事詩書

移居烏戍遙別溪干舊遊

客身憑徙望鄉關旅舍何堪復夢還書卷叢殘囊笈外米鹽
摒擋甕瓶間桃花失路遺秦種明月終令似漢閒解得鳴琴
長一室青山歷歷水潺潺

顏俊彥

字開眉一字雪暉桐鄉人

汪嘉穀曰雪暉前明崇正戊辰進士入國朝不仕築
苦提精舍環植松竹晚年博通內典儒服墨行以終其
身康熙初年卒

南華道中

將登古剎且停舟林壑層層入望幽山路空濛時欲雨法門
蕭颯正當秋寒泉石上流清響野燒風邊卷暮愁咫尺祗林
應不遠白雲重鎖萬峰頭

陳祚明

字允倩
仁和人

雲螭齋詩話允倩明侍御潛夫弟侍御既殉難允倩偕
弟康侯住家河渚貧甚走京師賣文爲活爲燕臺七子
之一

俞寶華曰允倩通志有傳稱其博學善屬文乞文者口
占授之語率奇麗填門迫促至廢寢食所著詩二十卷
爲稽畱山人集陸嘉淑顧豹文序之入
欽定四庫全書存目中

汪嘉穀曰允倩所著尚有采菽堂敝帚等集按趙雍客
安雅堂集序云往在京師與施愚山諸君子以詩學相
切劇因有燕臺七子之刻如嚴給諫顯亭
丁儀部飛濤陳布衣允倩輩皆杭人也

金魚池上偶成

郊林乍澄爽素商披我襟循坂憩喬木攬衣散曾陰平沙旣

逶迤蒼然見西岑復此池上樂坐獲濠梁心陂塘相灌注密
藻翳浮沉錦鱗躍日華朱鬣披丹金羣泳同所適獨逝冥幽
尋有多狎衆玩雖伏垂潛深何當縱逸性掉尾百川潯

送曹秋嶽少司農分藩粵東

才大容何易官遷遠未妨聲名畱北闕瘴癘且南荒雨濕桃
榔暗山空薜荔香倘能懷五柳松菊故蒼蒼

中秋夜長安對月有懷

雙闕暮青青西山倚畫屏更懸明月照何處翠華停桂子飄
仙苑霓裳奏廣庭白頭宮監在簫管夜深聽

張華故宅

落日俯秋原徘徊弔疇昔衰柳映蘆溝云是張華宅一自龍
歸黯暮星空畱孤語驕行客蘆溝橋下水粼粼蘆溝橋上生

黃塵士衡入洛誰相識不見當年博物人

賈島谷

房山石室薜蘿交灌木悲吟接鳥巢寂寞生前誰載酒蕭條
谷口問誅茅繙經悔失三車偈著論真同五石匏落魄愛尋
方外約無心爲解子雲謫

陳晉明

字康侯一字德公錢塘人有采菽季子詩留

雲獲齋詩話康侯嘗謂王李但揭高華鍾譚專搜冷雋
兩者均失之選有八代詩鈔初盛唐詩世稱善本云

鄒大孝直同被劫質在盜中僞與余爲兄弟稱請先出
辦贖卒就兵間營救得歸未能償金賦詩言謝

豺虎巢中那長策鵲鴿原上賴深謀無錢欲乞朱家買讓死
非關趙禮留竟自黃金酬部將遂令黑索免梟囚執勤但可
身居作廡下從君學飯牛

至正年間寺

至正年間寺荒亭撫舊碑日斜祇樹冷烟沒故宮悲人代巢
烏識風流繫馬思近來憑弔地無處不凄其

蓼花

苦蓼花爭發淒踈十里過葉垂臨水遍蘂密向船多濕翠沾
新雨輕紅落晚波最憐生意薄霜露復如何

徐允瑯

字子山臨安人

杭州府志子山精象緯六壬諸書戴布冠蹕臨市中夜則露坐山頂以測繆次論者謂古石隱之流
蔣炯曰先生隱居禹航阮窮守志與仁和徐介猗次海
寧徐孟錫炯一稱三高士猗次嘗有詩曰允瑯真志士
孟錫本醇儒與爾成三隱
偏子愧二徐高致可想

洞霄宮用蘇公韻

峭壁如城不厭頑神功亦惜此區閑七巖有洞通靈界九鎖

無風到世間偶爲幽人騎虎背遂教虛谷識龍顏勝游一旦
山千古依舊雲深泉自潺

錢汝霖

原名何青字雲士一字商隱
嘉興人諸生著有紫雲遺稿

草廬八詠

小橋

門前紫翠堆對坐猶遶繞欲與日盤桓休辭畧約小

流水

礪壑甫縈廻羣巒已萃止巖沸幾經來安瀾從此始

古樹

偃蹇一散材高陰卓亭午歲月不知深形容自爾古

柴門

蔭下立茅茨有扉不設鍵稜稜松樹枝聊用防雞犬

短籬

雲氣時時生乃在山之麓編籬弗使高恐礙登臨目

曲逕

門中頃步地瑣石裁令曲捷逕非所由庶云習我躅

細草

閒庭履跡稀養得蒙茸綠石罅賴彌縫跣餘還藉足

幽花

有美不期春有香奚事色澹澹以時榮尤宜供服食

胡

山

原名曰新字天岫一字海岳蘭谿人著寓廬草

朱爾邁曰胡子自聘革後棄家去陽羨懸壺武原市上後以娶婦至谷湖遂卜廬下居賣藥自給或上高陽橋

賞酒輒醉醉輒作詩以寄傲雖蓋無

斗儲枋無懸衣歌聲琅琅不顧也

俞寶華曰海岳本明諸生

則革後寓居吾邑峽石

山夜獨歸

月出上方白谿外磬聲冷山夜人迹絕獨坐發深省遙見開
竹扉一僧汲古井僧去我亦歸烟霞落高嶺

過朱求侯

愛爾讀書屋臨流雙板扉松聲落琴几竹翠撲人衣客到酒
初熟雲深鶴乍歸春來復徂暑會別轉依依

野步呈青士

幽居罕人迹一徑長蒿蓬細草搖光碧飛花撲袖紅孤村流
水外野艇夕陽中我欲尋高躅從君適華嵩

王蔚章

字豹采錢塘人諸生著消盤山人集

蔣炯曰豹采湛深經術與萬充宗創明漢學嘗推算六
日七分之義成易四譜既又成十譜精傳奧渺多所心得
其他若河圖論洛書論廟制論日度月度論太初厯
大統厯四分厯論皆推明絕學于舉世不爲之時其詩

雄渾深得
七子之遺

出塞

曾聞長水列屯間
又見良家早出關
趙信戍臨光祿塞
李陵軍在浚稽山
紫貂大雪腰弓劍
白馬平沙走佩環
共道人生行樂好
燕支何地不紅顏

文丞相祠

塞草邊沙迥自悲
行人瞻拜舊威儀
十年漢相鳴吳甲
萬里幽州作楚詞
明月雁關歸正氣
海天龍穴墜孤兒
可憐易世還祠廟
應勝羊公墮淚碑

陳廷會

字際叔一字瞻雲錢塘人

今世說瞻雲生有至性居父母喪斷去酒肉儼然骨立以貧教授河渚間拮据營葬頗竭資財發穴得舊棺仍掩之曰冥漠君不安卽親靈未妥也仍厚禮葬師而遣之

浙江通志際叔與孫字台治篤朋友急患難稱高士
際叔教授里中治時出遊四方采所聞見共爲詩賦
西冷十子詩選序畧際
叔文筆雅健諦稱冠絕
俞寶華曰際叔杭郡諸生爲西冷十子之一所著書高
華典則陸行人培殉難屬以妻子遂隱居河渚教其子
繁邵成立云

過慈雲寺

遠公駐錫此城東寶殿荒涼古寺中門映清池塵不染月高
雙樹色偏空飛花入座長疑雨拂塵當牕欲御風我悟無生
曾未得好將出處問冥鴻

贈陸梯霞

東郊十畝浸沉淪小陸當今鄭子真酒釀葡萄春薦母羨調
芍藥晚畱賓坐吟梁父看山色愁賦招魂問水濱自古風雲
多草澤如君何必厭垂綸

謁少保于忠肅祠

南山九月秋氣豪我來正當風怒號少保祠前松柏動白日
慘淡天爲高憶昔公當景帝初社稷移晷將坵墟挺身殿陛
扶大誼片言出口羣宴如朝廷復整叔孫儀四河仍奉周車
書出師捷伐九門開動地兵戈犯順來熊羆猛將誰善使驅
策先啟聲如雷此時鼠輩復何有建議南遷惟恐後王侯將
聽景陽鐘敵人欲折都門柳公也奮臂聲大呼抗疏力爭肝
胆剖郊廓九鼎長不移秦關百二方堅守自從土木喪我軍
挾迎大駕徒紛紛鄭人伐許示不急子魚謝楚真有軍六龍
巡幸真不返七載砥柱成奇勲功高反遭羣小忌奪門燭竈
慘難聞沈吟此事二百載瞻拜公祠心欲悔旂常竹帛總難
刊白意丹心千禩在誰人不思匡濟功安得如公靖多壘吁

嗟胡爲昔罹罪浮雲蔽天天莫晦君不見鴟夷忠荀息功被
疑見謗古今同我今謁公悲填中况復祠邊飛斷鴻歸棲啞
啞聲欲窮寒霜將零凋赤楓

高斗魁

字旦中一字鼓峯鄧人有桐齋冬青閣語溪諸集

續耆舊傳隱學先生嘗曰鼓峯叔遊茗雪間得山水空
清之氣深入詩脾故絕不染陳言可謂善狀先生之詩
者矣

袁鈞曰斗魁與斗權齊名伯兄斗樞自鄖歸喜曰吾出
門時二弟俱穉今所造乃若此鬚長似戟談笑傾座人
呼高髯從黃宗羲學宗羲之弟宗炎下獄百計出之

病起

病起精神覺未奢曉牕曝背試秋茶命窮詩句悲東塾道淺
文章愛白沙憶友終朝如有失傷貧一旦欲無家倦來就榻
風吹醒滿鼻寒香醉菊花

沈

機

字海鵬桐鄉人著梅涇草堂集

俞賓華曰海鵬身歷滄桑言多慷慨陳謹堂謂其硬語盤空非虛也前刻鵷笑集四卷已不傳今從濮川詩鈔入錄

瓜屋吟

瓜花黃滿屋瓜實如斗大參差瓦縫瓜壓破重重瓜葉還能補夜來不苦風雨過風雨過月滿戶削瓜把酒自歌和去年種瓜無一箇今年瓜熟免饑餓東陵故侯老學圃仰天一笑抱瓜卧

大雪後凍雨數日

昨夜雪消否凍雲朝復凝風威急于箭雨點半成冰獨鳥休枯樹饑飢竄遠藤天寒無客到自掃一牀繩

王

澐

字子雲一字勇濤海寧人著有薇水亭集

陸嘉淑曰吾里王勇濤與余交同輩風推淹雅創立新意作懷古諸篇于九州畧盡使好事者身同卧遊嗜古者情不給賞嗚呼盛矣然意不自足特往婁水謁梅村吳先生先生宗匠也稱其橫絕古今必傳于後無疑則勇濤胸有萬卷目空四海者非余一人之私言也

乘雨宿北山禪舍

乘夕向蘭若停裝借榻橫暮城昏雨氣秋枕接潮聲心與禪燈淡夢隨曉磬清攬衣渾不寐星漢露微明

無題

朔平一夜散平蕪簫滿秦樓鳳有無翠幔香飄金麥穗珠簾風捲紫蝦鬚榴花竹葉傾鸚鵡錦瑟瑤箏落鷓鴣最是王昌惆悵甚銀燈燒盡夢還孤

卓人月

字珂月仁和人貢生有蟾臺藥淵等集

池北偶談武林卓珂月崇禎初作千字文大人頌錯綜成章甚有理致

兩浙輟軒錄補遺

卷一

卓人月

俞寶華曰珂月杭府志雖載之勝國鍾竟陵詩歸亦選其詩但其尊甫蓮句已登前錄似應一例採入

秦淮竹枝

兩岸高樓倚白榆樓頭人面映顰鬢雨絲風片有時有雲黛
烟鬟無日無

東吳竹枝

光福楊梅血色斑洞庭茭實八珠環天生兩種堪消夏何必
吳王消夏灣

泊烏鎮不寐作

逆風逗歸期今夕寄淺港月出人不知閉戶若螺蚌遠寺燈
微明未罷老僧講良久喔喔聲荒雞引其項

讀方水弟別東園詩詩以慰之

且休問此徑誰開萬古誰非過客哉吾不必將吾室愛後當

復有後人來賀云之子隨鳩入笑曰狂夫愧燕回今日便如
閑借看長鬚爲我洗卮來

徐肇森

字質可秀水人著
有焚餘草

魏禧序畧先生爲徐太僕公冢子嘗與其友巢端明杖
策江東辭榮祿歸息先壠孝子忠臣之志情見乎詞
徐嘉炎曰先大夫贈學士公幼喜杜詩都未存稿兼以
兵燹之厄片簡隻字皆爲雲烟茲焚餘草二十餘首作
于乙酉丙戌流離播遷之際當脫稿嘉炎卽口誦心識終身不敢忘

歸墓口占

城亡去國全臣節母死奔喪盡子情何處首陽堪採薇不如
歸骨傍先塋

孫

爽

字子度石門人著
容菴詩集

汪嘉穀曰容菴師事程孟陽甲申以後閉戶著書著有
甲申以前集抱膝吟秋懷詩感遇詩辛卯集皆自序之

山行卽事

儼然桃李笑山意欲修容幽薄烟流翠空奇石聽松興能隨
鳥集跡欲請雲封何處驚人艷清暉影數重

夜步濠上

初月似相待春花影不寒偶隨風露色各悟性情單爲惜峰
紋暗因憐野望寬夜懷同茗沸支首坐星闌

柳枝詞

二錄

簾外新泥燕作家翦波嬌尾並飛斜浮萍夫壻長飄泊遮莫
生前是柳花

手弄長條日幾回忽思楊柳是郎栽風流樹已如人好不見
郎乘驄馬來

張

賁

字繡虎錢塘
人有白雲集

陳撰序畧吾杭張氏在明嘉隆間冢宰恭懿公與其從
弟澤山中丞立朝大節載在惇史白雲先生中丞之五

世孫也稟承家學才名蔚起詩歸橫渾五律
尤能深涉杜律與從兄素亭詩老和韻頗

阿磯

行路早戒心共詫阿磯惡陡絕萬嶺攢湍流衆溪錯微徑度
峻坂遙見飛鳥却車脆巨石撞馬墮陷深壑林莽白晝昏隘
壁迎面削立熊當路蹲人立欲爭攫三日度百里僕夫盡歡
躍坦道纔兩程前磯又磊砢泥淖更窈邃峯危似將落崎嶇
歷險盡平原見寥廓開豁心神怡返顧尙驚愕塞外茲絕隘
當關比劒閣蠶叢阻聲教安得五丁鑿車書幸無外殊方共
欣樂藉草且消憂憇此臨流酌

長歌贈四兄

我之初生方盛時諸父伯叔兄與弟開府以來五世居雍和
不讓張公藝八龍三鳳爭激昂門第文章有威勢少小同入

鄉塾游弟也四歲兄五歲誦詩一遍卽朗朗一日千行都不
計啄釘闢草百事兼趕鴨騎羊恣垂戾鄰家挖笋自烹魚入
水踰牆憂不細予母怒撻汝母噴三日兩日見流涕三十年
間家喪亡昂藏空負七尺長家家流竄同失所黃狐白狐白
日行飢寒離亂人盡死孤兒往往啼路旁弟悲勞獨率曠野
兄依茅屋供萱堂涉歷坎軻休苦恨海內才名忝二張兄唱
弟酬千百首凌轢顏謝卑班揚北地信陽兩寂寞而今作者
推錢唐眼前才子枉林立不與兒輩爭低昂人生富貴草頭
露痛飲休教日西注但使斯人永不磨蕭條那說儒冠誤吾
聞宣德年間有二子大者張輿小張輅見天下人物志挺興武林號
殊絕六季三唐雅能賦而今零落迥不聞風流無復推厨顧
祇見輿圖識姓名兒童莫辨荒坵墓方知此道亦易休相對

慨然悲清秋嗚呼乎相對慨然悲清秋

居庸道次韵

何事棲棲者經年萬里途曉行過涿鹿間道出飛狐雪夜荒
村遠霜天海月孤吾生應有托不是爲飢驅

苦雨同吳漢槎

異域關河邈滌霖越五旬陰風連北海巨浸隔西鄰旅病愁
長夜朝飢畏及晨百憂無倚賴腸轉逐車輪

姜燮鼎

字理夫
遂安人

浙江通志燮鼎鴻臚卿習孔次子少負異才與兄調鼎
友愛最篤七十年如一日晚當循次貢于廷毅然棄去
嘯咏山水間與牧童樵夫笑語竟日顯貴至門匿不見
所著詩冲淡雋逸旁及書畫篆刻皆精絕所著有山載
唾餘畱畊餘墨諸稿檢討毛升芳裒
輯成帙名高山集年八十無疾而終

語石歌

我今何不乘虬鸞螭東凌滄海嬉蓬壺又何不走飛廉鞭
列缺西陟崑崙瞰桃都行任坐卧數弓斗大室窮年兀守獨
對蝨簡如囚拘世間難盡遊者好山與好水難盡見者異人
與異書百年鼎鼎菌蟪耳積藏累塊空良圖且莫言五岳遠
九州殊卽如天台鴈蕩近在甌越之間安得驅之枕案供人
耳目娛客乃笑而起曰寓內名勝非一區峩眉匡廬競雄瀨
太華武夷天姥靈秀俱此外酈經所未紀拜之反愧袍笏粗
豆腍繭足徒叫絕愚公豈直古之愚見子門前高山麓有石
奇幻云何如突兀五丈或十丈嵌空玲瓏中外虛翠竹蒼藤
護其骨靜者如叟美如姝峯峯盡入非非想令人摩挲幾踟躕
草菴數椽無聖壘青霞滿逕泉流渠吾子可以高卧恣觴咏
醉呼懷葛隣黃虞石欲語君君不語捫膝浩嘆奚爲乎是必

結廬于巨靈之掌夸娥之跌象王之鼻玉女之顙雲海千里
萬里然後盪子之胸魄滌子之魂礪歎豈知規規一片石亦
足跨嵩嶽岱吞衡巫吾匪諛高山之石天下無噫吁嘻誠如
客言高山之石天下無

錢

豹字文蔚鄞人
有文亭集

續耆舊傳先生少有才錢忠介公未達時以同里同姓
厚期之已而世草不復進取家枕東錢湖上水光上下
山靈互答老衲黃冠皆見性地周證山曰柳州詩云始
至若有得稍深遂忘疲文蔚之詩近之臨終書一紙云
獨立對蒼天生平無大誤昔年如是來今日如是去論者謂先生蓋創遺民之徒與

旅愁

歲晚寒鐘曉開窗盡客愁飢猿收剩果孤鳥上虛舟雪重山
如失雲寒凍欲留溪東雖近酒不敢下高樓

聞性道

字天廻鄞人有
環流草堂集

續耆舊傳聞氏詩派自隱鱗先生後如賔王霄虹峻伯
皆有盛名在志泉前今皆無可考見石柱璘友兄弟嗣

從泉而出亦皆散亡吾甬上世

家文獻未有如聞氏之衰者

俞寶華曰張肯堂之死舟山一門二十七人骨肉狼籍

性道以三大喪至雪交亭一貯肯堂骨其二分貯男女

骨適肯堂部將汝應元亦至相與葬之茶山時人咸高

其義康熙十七年巡道許宏勲將以博學鴻詞薦力辭

答友人問詩法

詩亦文人贍無言句始傳譬如諸種摻只在七條絃曠遠來

何處孤高聽自然萬峰行欲盡獨立控飛泉

懷應聘

字華阜
秀水人

俞寶華曰華阜為張少司馬天植姑壻性慷慨好施戚
族待以婚嫁及撫養成立者極眾少司馬亦其一也所

欽定

四庫全書存目中詢之其家僅得殘集一帙併駕湖倡
和集中存之

南湖春望

江南二月鶯花早遠岫遙岑惜春好玉樹青蔥翠羽飛烟光
不斷靡蕪草簾外清風漾碧絲樓頭望盡斜陽道吳山越嶂
兩茫茫南湖一片傷懷抱湖光湖水蕩春陰春草春花寄遠
心湖當春日生愁景春到湖邊寫恨深魚書錦字情何限沅
芷湘蘭思不任惟有凝粧向湖望白頭一曲訴瑤琴

偕丁景鴻弋雲過梅里訪朱一是近修

爲訪梅溪隱荒村第幾家波涵秋浦月路入武陵花主客輕
時輩文詞閱歲華東山曾未出攜妓卧煙霞

登燕子磯寄懷王印周水部

懷君積歲華客路日將斜磯湧千尋浪蘆搖萬里花郎官長
繫瓠水部待期瓜莫動秋風思江魚味尚賒

偕范驤文白袁秣丹六泊煙雨樓志感

湖上蕭疎宿莽橫昔年曾聽按歌聲維舟對酒漁燈亂與客
登高雉堞平知己自憐逢范式讀書誰更比袁宏祗今詞客
悲興廢未許燕城賦擅名

送侗孩北上

二月煙花滿上京此行應愜壯遊情安車直詣雙龍闕彩筆
高揮五鳳旌別酒記傾傾若下寄書如問問承明知君意氣
同文舉何日封書薦正平

登錫山觀雪

雪裏雲山四望低補填崎路自難躋泉聲時和松聲亂山影
遙連塢影迷墮澗飛厓皆逸韻折梅招鶴合幽棲寒風吹得
青山白極目蒼蒼萬壑齊

招吳山濤岱觀鄭玉杓夜話

賓從澤畔幾回還簑笠誰攜伴釣閒野寺鐘聞明沒外一江
帆渡有無間論交意氣憑尊酒逸興烟波賦小山蘭漿將歸
愁日暮風迴雲盡水潺潺

張履祥

字考夫一字楊園桐鄉人諸生著有楊園文集

嘉興府志履祥幼孤稍長讀小學近思錄有得作願學
記遂渡江遊劉宗周之門歸益肆力程朱之書乃知陽
明之學非是甲申後隱居楊園村舍著書教授居恒雖
盛暑必衣冠端坐若對賓客修己教人一以居敬窮理
躬行實踐為本嘗云三代以上折衷于孔孟三代以下
折衷于程朱又謂元明以來惟許魯齋薛敬軒胡康齋
諸書可與朱子相表裏其他不皆醇論者謂履祥篤寔
宏遠軼薛胡而上之朱後一人而已卒後數十年學使
雷鉉表其墓

楊文藻曰楊園與當湖陸清獻公姚江
勞餘山皆躬行程朱之學人稱三先生

壬子仲秋許大辛過半邏候予不至留詩一章末有閔

農句述此

閔農初望雨插植苦不前植之未成苗飛蝗忽至焉趨趨喙
既出憂心殆已煎八月霖雨作溝渠成巨川車戽兼晨夜伊
誰敢息肩所冀雨滅蝗庶幾小有年重經水旱後殘喘或得
延豈知旤尤篤降此蟲萬千集根苗遂槁集穗幹失鮮初猶
十二三漸乃靡一全彌望皆朽折西陌接東阡蒼天誠何意
斯民日顛連仁愛寧異古必也民多愆我友其敬矣三復有
蝗篇

俞長民

字吾之一字
珂雪餘姚人

紹興府志長民主書院以講學爲事嘗語人曰今之半
霖昔之河汾也諸生有能爲房魏者乎爲天下開太平
以續陽明辨香此沈先生志也家距半霖可十里許年
八十餘每朔望赴講卽暑雨水雪必筇屐以往卒無子

村舍聞鷄口占

昏昏睡夢中一聲啼徹天爲問世間子聞之曾豁然高枕復

何憂偷得終宵暇可憐征戍人閣閣催上馬韶光旦復旦夜
氣長存否朝朝啼不撤振鐸以良久

張

默字潛夫仁和
人有枯吟集

俞寶華曰潛夫改名勿字長韜善摹古迹山水
過目輒能倣仿以折枝花鳥起家詩亦雋永

山居

空山長日下黃犬靜柴門楓脫何多事鳥過忽亂喧巖花斑
有色石壁古無痕適意前溪去逢漁各不言

幽麓荒于古寒林復淡蒼起聞霜果落半屬凍禽藏曝日巖
居獨占風樹雪將素懷差有托十里老梅傍

衆蟄泥潛駭春雷殷殷還奈何芳氣逼未得鳥聲閒密雨不
離樹重雲欲失山茲疇流已足分滴及人間

幽思

幽思不知何故發夕陽將下鵲鳴迴林梢夜白江沙濶村落
秋黃嶺巘開閱世風塵吹野馬勞人詩鈔酌尊罍相聞舊有
袁閣室孤坐唯招古月來

孫纘祖

字昭令一字霄
客嘉興人貢生

金閨雜咏

閒攜雙屐向河橋綠野青旌入望遙幾處鶯花連粉堞一川
煙雨送輕桡庸春人去名還在響屨塵空恨未消無限吳宮
零落盡空城猶上伍胥潮

郭外招提敞客蹤青冥樓閣蔭深松銀濤聲咽風前笛玉杵
煙沉霜後鐘天半落霞低去鳥夕陽高檻倚孤筇家山渺在
長湖外凝望偏嫌樹影重

朱之嶼

字楚嶼餘姚
人有治舟稿

徐闇公曰予近與柴樓諸子結詩社始知浙東風尚各以孤峭之質傳幽渺之音自關町畦不隨時好比見楚嶼詩神清詞奧獨抱古心信浙東多奇士也

遊仙詩

言登小夏山朝日開層霽大鳥咲長空猶疑王次仲靈書變篆文豈爲嬴秦用雲際墮三峰健翮遙天送

翁

逸

原名月倩字元美又字民別餘姚人有後輩碧軒詩稿

黃太冲曰先生詩稿半籠今古排比諷諭非其所長而彫刻雲煙揆挾花鳥時以一聯半句奪人目色

舜江逆旅

鹿塲餘破屋野蔓羃踈櫺塞向全非土樞門但有繩寒眠稽織褥夜誦篋糊燈我亦隨吾遇悠然樂寢興

雨中訪張子威

迢迢風雨駕孤舟來向西溪訪舊遊剪燭深杯情似昨聯床

兩折簪紉添補費

卷一

翁逸

張炯曙

三

薄被夜如秋竹窗鳥墮煙梢重花徑螢隨暗草流話到明朝
還欲別嚶嚶聲裡復颼颼

張炯曙

字箕仲一字匏齋餘姚人有不已齋集

邵元朗曰匏齋爲二稽先生仲子出爲客卿孝廉後不事家產閉門索句不喜拾人齒後語得酒卽醉縱橫今古每至淚下

王將軍歌

有序

四明有王將軍廟舊祀王翦道書則以爲秦將王鄣也余過大蘭徘徊古跡因作王將軍歌

烈風吹山山石裂驅山入海海波咽巨鰲力怯電鞭掣老木撐空見秦節退飛精衛夜噴血秦時月墮萬古雪側路山都一脛蹙因風作噉逞餘孽頭顱擲去肝猶熱雨冥林斷路如漆陰火然空影不滅

江行

霏霏朝霧卷山氣入空濛橫練一江水峭帆五兩風長年悲計拙久客易途窮却感浮生事勞勞逐轉蓬

吳夢鼎

字仲鎮杭州人官蘭谿知縣

俞寶華曰仲鎮順治三年巡撫張保舉賢良檄署蘭谿知縣以搜捕土寇殉難于窄谿

蘭陵道中

運會何今古焚香祝太平干戈憂父老戎馬愧書生富渚搜山寇閩江耀使旌帆開神力助辛苦是王程

吳名溢

字堅知一字我號錢塘人諸生

浙江通志名溢為春秋詳注喪禮注晚年構葺園于城東與嚴沆柴紹炳查繼佐和芻佳吳山濤輩觴咏其中

有藥園盍簪集

冬白苧詞

兩折贈肝錄補遺

卷一

吳夢鼎

吳名溢馬湘

看

夜風蕭騷促寒杼
館娃宮中列寶炬
美人結束澹容與
爭向君前舞
白苧趙琴秦箏仍次序
絕調清商響
花杵裂帛一聲杳
何處纖腰宛轉因風舉
妙旋自是蓮花似霎時
階前拾翠羽
玉容嬌困氣如縷
薄汗搵粧霏
紅雨更咽銅壺夜正長
越女那知非故鄉
一卮美酒壽君王
破楚門東霜月涼

馬

湘字芷鄉秀水人官鄆縣知縣著就園詩草

嘉興府志湘在鄆捐俸開嶺行人歌於途後爭疑獄于監司去官送者萬計

送春日懷故鄉作

何事春歸人未歸
故園風景覺依稀
蠶車雨過荳初熟
燕壘泥乾笋正肥
白玉欄邊橫芍藥
紅雲架上覆薔薇
最憐香閣誦誦語
買得生綃促製衣

張競光

字覺庵杭州人有寵壽堂詩抄

柴省軒答覺菴書足下之詩學等達夫富幾子美與會
既豪才思不竭僕觀之氣盡小巫自廿五礫何敢復談

拙工

俞寶華曰乾光爵位莫考但所著龍壽堂詩已入
欽定四庫存目中廣爲搜羅僅得詩數首

題天竺上人山居

屏迹春山枕翠微竹房寂歷偃荆扉六塵縹緲黃雲靜三徑
陰森白日稀天竺先生懷古處南宗高士蘊清機深花碧草
垂垂發檻外流泉百道飛

山齋卽事

岳嵐四望阻風雨到柴門苔滑人踪靜林深鳥道喧新花入
戶積細草觸堦翻幽谷誰相問蕭條啼夜猿

葛宗信

字行之嘉興人
著安素堂詩稿

柯聶序畧行之枕蓆經史百家意所
感觸悉見于詩凌紙怪發前無古人

余習曰行之性清嚴刻苦居京師不以一刺入貴人門著述屹屹不休其詩清蒼樸老直追少陵

嘉興府志行之工詩尤長于史吳給諫源起延致都門一時章奏多出其手

圍城嘆傷俞給諫元良作也

鹽官城頭陣雲合一旅偏師守孤邑精兵日夜攻不休龔緒
驚濤作山立觥觥給諫氣吐虹身率義勇嬰刀鋒頭縱可斷
志不屈要使毅魄隨雙忠弟子姪同畢命給諫兄元明子燁南兄子翔南
同日張許千秋共輝映吁嗟天意豈可違風疾難搖草心勁
寂寞英魂不可招一門忠義話漁樵我來灑酒尋荒塚悽斷
空城打暮潮

姑蘇

孤棹繫沙汀風輕落曉星濤浮五湖白山蘊數峯青隱吏思
梅福遊仙憶蔡經館娃空舊迹何處貯娉婷

寒山

高人不見趙宦光畱得層巖選佛場瀑布遠從千澗落寒梅
斜破一林香

來

蕃

字成夫蕭山人有北沙集

毛奇齡二老傳畧成夫十歲試即冠軍詩古文力追先
素崇尚粵行嘗作故明二畿賦雄奧桀驚初不示人即
示人亦以口給厭棄之少游

劉蕺山門蕺山曰子狷者也
今世說來蕃負夙穎並精六書能作古篆隸八分第不

輕為人寫好立名節每道東漢人物或以東漢人相擬
則喜來本甲族蕃獨貧空敝衣履裂所儲圖史外瓶盞

十餘每出行書衣筆裘手自抱持嘗大雪忽憶毛甦遠
遊覆笠登香爐峯四顧蒼茫

吟所製八君詠詩慟哭乃歸
商盤曰來氏為邑中望族軒冕恒赫北沙獨淡寂自高

每出遊攜書滿袖遇當意人語終日不倦否則絕口不
交一言人以其

語默卜臧否
俞寶華曰成夫詩
見感舊集及越風

鄧躑詞

山頭躑躑花半紅山前棠梨亦蒙茸南溪少婦蠶獨苦桑條
枯折蓓蕾空桐花開時卷蠶薄楊葉暗時促蠶叢傳聞蠶與
馬同種馬生蠶死理則公丁男種桑宜飼馬剝皮割肉還無
暇婦人從夫仰衣食促叢卷薄空歎息

偶成

伏枕滄江上貧家獨樹幽巷畱千里駕客共百年憂晚秣垂
南畝秋瓜蔓故邱山川已殊異愁上夕陽樓
野園秋水曲學圃寔情人菊放香沿屋山明翠遶城賣魚供
晚爨養犢待春畊尙識前朝事高談涕淚傾

徐士俊

字野君仁和人有雁樓集

今世說徐野君少奇敏于書無所不讀發爲文跌宕自
喜好爲樂府詩歌與人交如坐春風一長可錄不惜齒

牙獎成故所至逢迎恐後爭禮為上賓日有程課雖老
勿替讀書無論多少必自首至末以覽竟為卒五經歲
一過有徐廣之風曾遇異人授以導引法
年近八十蒼髯丹唇顏面鮮澤如嬰兒
何琪塘樓志畧鴈樓徐野君築紀伯紫詩所
謂新詩樂府傳桃葉定本名山署鴈樓是也
俞寶華曰野君詩以感
舊集所選特按訪補入

邱山草閣小集

借得春山作畫廊更添花木兩三行人如林下清談客閣似
川西舊草堂不雨不晴真氣候非絲非竹自宮商數杯已覺
陶然醉卧聽催歸叫夕陽

蜀中竹枝

蜀山高高天際齊蜀江清清浣妾衣高唐驛中尋夢去鬼門
關上喚魂歸

秦淮竹枝

桃葉堤頭連水平輕衫簇簇踏堤行儂家心事流不去嗚咽
秦箏指上鳴

湖水青青浸柳花三山門外莫愁家而今誰更愁如我獨抱
茵于數亂鴉

東小河

風裳水佩若為裁東小河邊望眼開莫道聞歌人不見荷花
深處蕩舟來

顏鼎受

字孝嘉一字初陽桐鄉人

朱彞尊經義孝嘉同儕士也游學桂陽遭亂入衡山
為道士誦詩弋獲四卷六義辨一卷國風演連珠一卷
皆山中
所撰也

曹秋岳與永興令書盛仲老筮仕桂邑越在鄰封文學
顏孝嘉買舟赴之孝嘉抱應劉之才而困於山澤兩君
皆不佞至親而
念孝嘉尤甚

俞寶華曰孝嘉遺集久湮誌乘罕載然觀竹垞贈句云
桐鄉顏氏子才大最能詩此老決非妄譽人者茲從盛
氏仲來先生盧陽唱和詩得見數章盛吉甫丈
復以抄本全集見示亟爲補採以彰潛德云
汪嘉穀曰孝嘉少以孝聞九歲能詩得句云輕風搖翠
竹微雨滴黃花邑人至今誦之著有嶧山堂半樂亭詩
楚山歌自郴州還桂陽作

楚山高復高楚水深復深悠悠行路難每傷遊子心遊子越
險阻往來桂與柳柳江鳴湍急桂嶺秋夕陰西涉雉雞岡東
眺龍虎岑縹緲白雲峯蕭疎黃葉林俯瞰金牛潭泠泠瀉寒
音草木漸搖落猿鳥多悲吟縱觀豁高目長嘯開幽襟欲招
蘇耽鶴且攜宗炳琴巖城照霜月四圍鳴杵砧酌酒聊自勸
慨然思難禁

登君子嶺和譚孝廉韻

此山奇秀甲盧陽憑眺當秋客思長曳履九重無捷徑振衣

千仞有高岡知音爲聽新詩好薄醉仍憐故態狂畢竟登臨
須我輩眼中誰與論低昂

宿毘陵驛

戍鼓闐闐水拍堤皇華舊路草蟲啼可憐無數南歸客同向
郵亭一樹棲

松臺雙井歌

松臺山下有二井一爲泥濁一清冷借問傍人那得知我獨
悵然發深省上流下流無二源歲久寒潭照人影下井棄之
在草中上井爭來汲修綆由來高下不在意自思所處誠何
地源泉豈必爭細流汶汶徒爲世所棄涇渭旣分好醜生見
好謂醜非人情但愁清者還可濁誰使濁者能復清誰使濁
者能復清不見世間萬事皆虛名

秋懷

古鄂城臨青草湖蕭蕭苦竹帶黃蘆乾坤逆旅千年客鄉國
知交一字無北渚寒雲天色慘南樓清夜月明孤當時王粲
無家客感慨還應似老夫

迤邐秋山落日明路從深箐入蠻阮新田芋熟樂巴郡石室
蒿深義帝城四塞風煙如一色五溪言語不同聲蒼涼每有
窮途泣此日猖狂似步兵

九嶷蒼翠畫屏看山桂飛香白露團滿目風塵孤劒在容身
天地布袍寬誰聽赤壁濤聲壯獨對黃陵月色寒嘆息爲儒
逢此日生涯只合老漁竿

作家書寄示鳧兒二首

數語江頭別南荒歷歲時征途吾欲老人事爾應知失學能

無悔恒饑勉自持年來頻夢見春草舊園池

楚水登臺望茫茫不見崖三年兒有室萬里我無家赤地難

輸粟

時吾鄉旱蝗

青門待種瓜寄書何日到念爾一興嗟

旅感

郁李穠桃自著花春愁隱隱望天涯誰知倦客無歸路却道
狂夫不憶家地遠蒼梧連百越江流赤嶼帶三巴顛危獨幸
身還健兒女閨中莫嘆嗟

羽騎如林日夜呼戈船喧集洞庭湖三河壯士知多少六郡
良家尚有無月裏悲笳鄉思切牀頭長劍客心孤滿堂珠履
紛紛去相對空憐舊酒徒

時幕中諸友皆歸惟余與雲上在署

甲寅四月十五日值余生辰久客思歸困於兵革因詩

賦感

首夏清和綠野平鄉心愁聽鷓鴣聲十年結客黃金盡一夜
催人白髮生出處應知吾道重安危不係此身輕差慚馬齒
徒加長自顧難爲伏櫪鳴

懷古

夜遊宮禁意如何滿院風吹竹葉多一輛羊車忽不到愁看

荆棘卧銅駝

晉宮詞

昭應祠連望帝宮杜鵑血淚滿枝紅低徊四十年間事花蕊

夫人一笑中

孟蜀宮詞

秋懷

風景年來並不殊此因多難少歡娛空傳異氣飛雄劍枉自
愁吟擊唾壺送客亭邊秋色早望鄉臺上月輪孤口脂眉黛
甘憔悴可道羅敷自有夫

殘山剩水對高齋幾度登臨遣客懷音賞琴徽桐出爨賦成
書帶草生階浪遊不惜身如寄痛飲何妨死便埋赤縣神州
俱帶甲漁樵端合老吾儕

一入荆蠻六七年土風形勝足畱連湖分青草重重浪日落
黃陵樹樹煙楊子不勝頻泣路杞人何事獨憂天河清可待
憐余老寄語英雄早着鞭

浮雲落日共天涯送暑迎寒幾歲華吾道應知難入世此身
不合便無家高齋日給空糜粟遠戍秋期正及瓜怪底近來
詩思減吟殘白露與蒼葭

麻衣藿食久能甘欲附青雲老不堪司馬驕驕裘已敝莊生
蝴蝶夢初酣中宵忽憶聞雞舞當世何勞捫虱談自愧才非
遷客比浪傳名姓在湖南

空將老淚涇征衫邨得秋風便挂帆憶母堪憐腸百結逢人只合口三緘荒烟白荻迷沙瀨冷露青楓暗石巖縱使歸耕年已暮苦無筋力荷長鑱

高佑鉅

字念祖秀水人貢生考授州判著懷寓堂集

高孝本傳畧大兄爲虞部公長子虞部教子嚴言小誤卽正色誚讓未嘗稍假借以是兄學問得早成虞部公卽世兄年甫二十爲譚掃菴先生壻掃菴多讀書富著述兄之古學得力於婦翁者居多後同朱竹垞太史入都兩載方歸自是游展徧南北兄博聞強記於明季朝事及東林復社門戶分爭始末尤諳悉故家舊族科第行輩能鑿鑿言之閱書藉有悞字卽能指摘虞部公撰有自靖錄兄增輯之梓於金陵自朝紳庠士農賈僉從搜訪殆盡作詩典雅文詳贍八十外燈下作蠅頭小楷一行七八十字今所存遺稿非離婁幾不能讀年八十卒子一洪模

王西樵考功阮亭儀部招同諸子上元雅集

昨夜天街月似水遊人寥閨紅塵裏今夜華堂燈似月相逢

不厭清樽設長安邇日厭繁華不教火樹放銀花賜酺漫問
鰲山宴傳柑且醉琅琊家琅琊兄弟稱二妙儀曹考功並清
要禁內流傳錢起詩宮中解唱微之調良宵折簡邀唱酬滿
座清言月影留西園冠蓋無俗士南皮賓客多名流愧我風
塵迷到處馬蹄頻踏長安路佳辰獨客不勝情將迎幸覲三
珠樹東亭進士
同坐在坐半銷蠟炬落殘梅漸覺嚴城漏鼓催聞道金
吾將禁夜燈前把酒莫徘徊歸路星橋浮碧漢香車寶馬俱
飄散耳邊但聽伊涼州一曲關山助愁嘆

同沈留侯陳淡持湯千里飲報國寺松下

慈仁怪松枝如鐵年深鱗甲欲飛裂掣雲抉石龍虎形見者
驚喜嘆奇絕我曾三度至燕都酷愛此松天下無安得寫以
韋偃筆使吾坐卧對此圖每返鴛湖遠相憶夢魂長在蒼松

側今來結伴續前遊未午拍浮到日昃嘗聞豫章喬木棟梁
材工師遠取江之隈何如此松磈礧抱奇質五百年來尚在
哉

落帆亭別諸弟

六月經長路孤舟問去津自憐垂釣者忽作遠遊人門戶憑
諸弟關山憶老親平生慷慨意到此一沾巾

任城南池同朱錫鬯

扁舟來泗上徙倚到南池秋水荷香細孤城日影遲羣公誰
載酒行客共題詩欲別重回首披榛讀斷碑

陳巽之

字風人臨海人貢生

燕邸病中口占

桐栢桃源足自怡無端策馬到京畿可應苜蓿盤中味療得

先生此日饑

寄跡祗園三兩旬風沙積向釜中塵
禰衡刺字都漫滅嬾癖尤爲僮僕嘆

李明磬

字山顏一字蓼園嘉興人孝廉官福建古田教諭以子陳常貴贈中大夫有樂志堂詩集

朱彝尊曰崇禎初海內文學之士舉復社以應東林于是李君山顏年尚少與兄石友青來兄子曉令均入社壯歲館三衢流轉閩嶠以鄉貢署古田教諭比還里葺故宅曰蓼園教諸子所爲詩歌爲曹侍郎潔躬所賞余旣避地長水與山顏比鄰而居嘗以中秋曹侍郎招飲湖上分韻賦詩山顏詩成有幾人能及故園秋之句四座咸嘆其工蓋山顏于詩不費矜鍊而豐華安雅身雖不遇初無怨悱之言斯名在鈎黨終克遠禍非明哲之士與李稻塍曰先生同懷石友先生有勲歌集綴于火前輦稱負幹畧尚氣節詩亦如其人乃求其片言不可得同祖兄青來先生以宦遊死于粵集亦無存唯卓珂月古今詞統載有阿那曲一闕每誦吹盡蘋香不見人繞堂寒月鵲語之句可想見其風流已

鶯脰湖市樓晚望有以蔬果見餉者賦此

市頭臨笠澤漁火逼珠龕水溜雙橋下帆飛八測難村肴分
白小山果得黃柑便擬探林屋還愁路未諳

送沈魯餘歸武林并懷定山

天邊戎馬正高秋海外相逢涕泗流憂國十年空說劍還家
五月尚披裘種花舊有羅含宅作客還登謝眺樓此去脊合
原上問一竿何處泛漁舟

方城鄉

字稱官
遂安人

楊秉初曰稱官性孝友母夫人年九十苦昏耗飲食起居躬自奉侍嘗偕季弟成邵遊吳門弟邁危疾舌苔長寸許稱官親視湯藥以帛裹指拭口中指爲潰爛人稱其孝友焉後以子象瑛貴贈編修

慈慧菴

蠟屐空山裏春風祗樹園野花香出塢修竹翠成垣法會麝

僧供禪規靜佛門聞鐘微笑處不識道何存

潘錫晉

字子畫一字嵩來烏程人貢生著有嵩在樓詩稿

楊文孫曰嵩來曾以事戍尚陽堡時陳相國之遜亦請塞外與之賦詩談道引爲深契

歸興

風雨茆亭好結隣名山應不負高人身
經憂患安貧賤事到艱危仗鬼神
夢裏關山堪問渡尊中天地不成春
歸來原有桃花路茗葉松枝隔世塵

邵

琳字席之一字獅山餘姚人官山字洪洞知縣有曉山堂集

方象瑛曰先生詩文爾雅教諭遂安善于啟迪學署徧種梅花暇輒與姜理夫諸君琴樽燕洽

楊縣謠

楊縣古沃區比戶事畊作自遭萑符盜民力遂癯
削云何虎而冠嗜肉恣屠嚼敲撲窮民髓附益上官橐
祇憐徑尺膏不

補千尋壑盜去數家存官來比戶索寧爲泛水鳧莫作野田
雀水鳧宿有時野雀暮安托尺水能覆舟勿謂小民弱

褚

醇

字徽爲一字書齋嘉興人諸生有褚子癖言

王翊云徽爲興至捉筆

聲如金石懷如冰雪

屠爌云徽爲時當多故慙亂排離拊心殊劇其詩懸流萬仞觸石怒飛非尋常所可拘測也

病後齋中獨宿

半墻月影床前明風翻樹底葉作聲病客此時不能寐哀蟬
來朝始得鳴依依故人十年別遙遙深夜孤燈清忽聞芭蕉
灑微雨起視庭堦苔蘚生

除夕

斗酒醉未得單衣寒獨親明朝青髻老不是去年人

陳大瑜

字惟瑞寧海人官平陽訓導

庚子興賢閣聞柝聲不寐作

擊柝復擊柝寒聲徹夜繞城郭短衣敝袴不蔽膚當空露立
雙赤脚冰生石上風更吹霜滿城頭月照著熐熐野火滅又
青閨靜千家都禁作高齋瞥見讀書燈夜分不焰也休學譙
樓更鼓偏遲遲陋巷雞籌尙漠漠擊柝擊柝夜如年矯首東
方未明却

靜方禪丈

鐵江吾贅里數載一相過舊徑繁荒草新庵胥女蘿潮痕隨
雨長樹色入秋多同願安禪室中原息鼓鼙

盛

逸

字無疆
海寧人

蔣炯曰無疆窮困年七十餘無妻子其姪婿張爾佳
于紫雲山旁爲築域及死厚塋之并梓其詩以傳

九日

今日重九日忽忽秋已暮獨坐對南山悠然與古晤茱萸持
作囊夕英持作脯有酒斟酌之良辰莫虛度但惜登高名筋
力不如故徘徊籬落間聊以適吾素

坦步

坦步應吾道春來病未刪小門深閉草壤壁遠當山野興鳴
禽續詩懷醉夢間橋頭梅漸好新漲已平灣

錢爾復

字仍始一字子湘海鹽人諸生著半完圖詩稿

嘉興府志爾復明太常寺卿錢薇四世孫以足疾不與鄉試詩文雄健有獨立霞表之槩晚年築小圃顏曰半

完學者稱半完先生

汪嘉穀曰子湘先生居海鹽之半邊邨早棄儒巾築小圃以自娛因號半完居士詩爲秀水諸草廬宮贊訂定乾隆中從祀鄉賢

題南屏叔聽山閣

古來名山亦寥廓大者崑崙次恒霍嵌空拔地何嵯峨想見
百靈輪斧鑿其中喧寂難其名要以耳目生神明洄溪複洞
雲杳黑飛泉植木風鏦鏦風旋銷分雲亦淨此時耳目開閒
境能使無聲化有聲森然萬籟樓常性南屏先生方掩關著
書寂寞神不孱廣庭竹木展幽異宛若磴道盤空山山空無
人成獨賞此閣與之俱俯仰縱然不雨亦不風肅肅心魂癡
竒響

半完圃自題

有圃不植菜與瓜有池不畜魚與蝦半畝梅花三面竹恰箇
方沼種荷花

秋日過剩舫夜話卽席題贈

功名真似挂鈎魚閒買青山好卜居一舫剩來消受得載些

花影伴殘書

閱竹垞先生詩有八月十五枉駕草堂聯句一首時斯
年弟兄在坐意在壬辰癸巳間耶忽忽三十餘年予忘
其詩并忘其事矣追念爾時狂歌痛飲客誠罕儷主亦
自豪今雖路隔雲泥抑亦年皆遲暮卽再剪臨歧之燭
重銜對月之觴恐平生飛動意不可復問況渺若河山
音塵少接乎爰賦短章爲之一慨

君爲太傅忠賢後我亦黃門直諫孫杯酒一時聯意氣壯懷
千載動乾坤棲遲巖壑謳吟遠傑直承明詔語溫兩地升沈
疑隔世獨邀涼月伴清樽

張振孫

字祖定錢塘人著有兩峯樓集江行草

楊文蓀曰振孫綱孫弟綱孫在西泠名士中風流冠于
十子振孫亦工五言律允稱競爽如答陸蓋詩云草新

魚食脆花落燕泥香西溪道中云松稍懸栗鼠竹底出
杉鷄山行云落花春草徑疎雨夕陽山初陽臺云蒸波
昇海日障嶺落峯雲泛舟城北云松翠因生雨荷香不
待花過桐廬云牛行楓徑晚鷺立蓼州晴尋隱者云泉
衡石却立峯黨鶴翻飛句
皆警鍊深窺浣花翁堂粵

南山訪砥中不遇

扁舟春泛泛山下問山家古塔撐烟直長橋出霧斜門庭參
竹色籬落亞梅花徙倚待之子采薇山徑遐

孫猷葵過訪兩峯樓

爲客沽春酒高樓看雁飛未霜橙尚綠食稻蟹新肥落日生
秋氣空山老布衣知君愛泉石訪我應忘歸

勾壘

幾年臣妾向姑蘇甲士三千竟沼吳伯業可憐追逝水蕭蕭
舊壘叫啼烏

章世法

字宗之一字青峯會稽人諸生著青峯集

浙江通志世法篤學勵行往往至困無所悔諸書必窮根抵毛西河聞其品學深許之嘆曰何相見晚也

金山

金鰲初地迥四望絕塵埃山勢一拳立江聲萬里來長風走
艦艦清磬盡樓臺京口孤篷速登臨句暗催

沈

煌

字火文一字日嚴嘉興人貢生著有宏益堂偶擬詩

楊文藻曰火文詩英飛秀結篇翰甚富當自刪其集存其合于古者名曰偶擬

天啟宮詞

豹髓燈懸鵲鵲紅
鑾輿晏罷帶雕弓
敕教繡鐙三千隊
共赴西園看射熊
內監傳呼謁聖人
押班紫袖學稱臣
近來喜出毛延壽
天子臨軒自寫真

櫻桃初熟賜專房琥珀盤盛耀夜光鸚鵡昨宵今已渴代呼
萬歲謝君王

紫袍宰相代親迎聞說中宮最聖明寶鴨急燃龍腦麝早朝
猶恐過鷄聲

每從皇后學親蠶織罷休將錦匣函願賜廷臣囊諫草幾回
御手得常探

花開午影射采恩較罷文書退每遲架就珊瑚傳內旨官家
親許教宮詞

傳

日

字午侯山陰人著壯遊叫月等集

俞寶華曰午侯與王雨霖輩號四君子凡所遊歷悉寓諸詩年九十歿前一夕手書訃狀附以絕句分致友戚亦可謂去來自如者矣

臨沒示友

一入紅塵九十秋投閒筆墨遂風流重來改換頭和面不是今朝傳午侯

黃

鼇

字崙玉海寧籍海鹽人歲貢生以子龍眉貴贈侍講學士著鳳巢前後敕六草堂等集

汪嘉穀曰崙玉從父金鼎游學海寧遂占籍焉金鼎中前明天啟甲子舉人崙玉克承家學築梧陰書舍教授生徒及門稱盛杜宗伯臻陳侍郎論皆其高弟也故集中有寄杜句云回憶梧陰樓曉月忍堪鏡裏對秋霜

登淮安城樓

客有歸興嘆登樓思渺然斗牛天上落吳楚望中懸菴笛梅花引秋風桂樹篇王孫何處問淮水自年年

汪用嘉

字南炎一字蟻亭歙縣人寄籍浙江諸生著有借山樓詩文集十二律力圓圖大易廣互圖大易兒

訓等書

兩浙鹽法志南炎嗜古好學於書無所不讀尤邃於周易性至孝藉修脯以供甘旨怡然色養年四十會母喪泣血三年哀毀成疾頻死者再乃棄去舉子業隱居授徒發明先儒性理諸書與旨從遊者日衆生平持己端

方而不忤於物接
之者如坐春風

秋殘

人同秋樸蕭風景日彫
闌葉落樹逾老霜凝石更寒
雁聲雲外續蟲語壁中殘
獨有幽居者悲心託素翰

簡濟懷伯兄

亦似蕭疎亦似顛
珊珊秀骨小神仙
莫誇壯士黃金囊
秋水牀頭詩百篇

陳令盛

字廷藪蘭谿人順治辛卯副貢生官上猷知縣著有古池文集

陳傳經曰廷藪先生出宰時勤墾荒地百姓賴之事載蘭谿志

白門旅感

澹蕩晴光迥秋蛩到處鳴
離情愁外見奇想靜中生
落日非無意行雲似有聲
秣陵翻在北客思幾回更

卷一終